

Marc Dumas

**Camin
d'un santuàri**



C.I.E.L. d'Oc

Centre International de l'Écrit en Langue d'Oc
3 Place Joffre, 13130 Berre L'Étang
<http://www.lpl.univ-aix.fr/ciel/>

1 - Neissenço

Lou lustre d'uno draio amigo
es sèmpe uno joio encaminado...
Sagéu d'uno ànci pèr uno obro de naisse.
La perverseta sarié de crèire à-n'uno bousco,
dóu mens que vèn d'uno semenço d'èstre.



Que lou printéms s'endigne
à-n-un flour de camin i sentour de pegoulo sereno,
e ié bandira quàuqui perlo de penitènt-blu
sus aquelo cuberto lisco d'aguïo amaro.
Dins aquesto enciso milenàri de roucassiho
lou barjavoun leisso flouteja soun innocènci.
Es lou moumenet d'un simplige d'amo.



Se couneissiés la lengo dis sourgènt
saupriès que tout es camin...
Sènso jamai se destroupela de soun plang
aque'l' autre Camin, éu tambèn noun fugi.
Miés, coumpli si permanènci
dins li trevadis tucle de sa neissènço.

Leissas-nous nosto paureta...

Vaqui perqué noun s'entestardis,
quouro sèmblo barrula dins li cereisié groumand.
L'enfanço n'es qu'un presage d'assoulu.
Au bestour dis amourié bouscas,
un carihoun de vilage dins li baisso,
trimo pèr arriba i proumié pendènt.
Es-ti encaro d'ouero pèr s'entourna à l'oustau?

2 - Amour

N'i a proun d'un cascai de frescour
pèr douna un carage
à-n-aquéu draïou gris d'estiéu.
Escateira dins li gràci bruno de l'éuse
que l'acoumpagno,
e presounié d'aquesto redoulènci de terro desprouvesido,
Encanto i prelùdi d'ama.



Tras lou ritme d'aquest' estirado de set,
afloura dins uno sourdino de bouis paciènt
e d'un fuian is aleno fugitivo:

S'aubouro...

Prince, despartira la bouta is erbo de la Sant-Jan
e mai lis amaro-pan d'eslùci suau
e li secrèt de plenour à l'univers que butinejo.



De silabo d'amour
percoulon lis espinas e li nerto
coume di perfum dessena de femo.
Passa li proumié desbord de la sabo
lou trat frejas plego un pas de tendresso.
Un boufe fai freni d'uno musico estranjo
li larvo d'èime qu'acabon d'espeli.

Leissas-nous nosto paureta...

3 - Fegoundita

Aquelo jouinesso d'escalado
es uno trobo sensualo d'un cors.
La caresso aludo di cisto blanco
es un estroupa de draiolo cando
i redoulènci carnalo d'uno viergineta.



Aqui, uno vierge is ortigo
vai encarna dins soun anounciacion
de la pèiro
tóuti lis ouratòri di mount-joio.
Apielo uno óuferto universalò
desempièi de siècle, aquel arc d'ama
uno semènço d'espéuto vengudo dóu Trelus
sus di capitèu d'ouro.



Lou giscle amoureux de la terro eisisto:
Quouro un païs empeira
se douno ansin à l'estrencho dóu cèu.
Quàuqui poutoun frustejant
li raro de la car de l'amo...
E n'i'a proun d'un silènci d'auroun !

Leissas-nous nosto paureta...



Dins un estampèu de branco morto
lou ruscle s'escampihò,
encumbis li roudau li mai prefound.
L'acoublamen revesso l'erbo esclavo
pèr un vèspre de lié.
Es l'ouro que la volupta crearello
restoublo li forço nuechenco dóu cor.

4 - Mouri

L'iver cresié s'esvarta de la fre
escarlimpant si gèsto devers lis adré
moune lou soulèu se cerco
coume lou farié un avugle.
Sus soun front d'escapado:
li rufo d'un ourizount
d'isop desseca, couchon l'ouero di cèdre.



Quouro la nèu caligno si gardo
es pèr miés fisa à-n-autro lus
la travessado d'uno escourtado tragico
apara pèr li ressoun di nimbe que van e venon
d'uno baumo à l'autro.

Leissas-nous nosto paureta...



E vous àutri, miradou!
en vòsti siàuvi crudelita,
alucas la proufecìo dis avalido
abandounas lou sòudard sènso bandiero
que camino devers li toumple sèns inne
i prince di noun-rèn e i ràbi dis aurasso.

Relicle sourdo... i cant de l'aucèu de Nouvè
que crido sa fam de pas
sus soun ajoucadou de lindo souleso.



Leissas-nous nosto paureta...
e nòsti garagai cava
amé l'aigo de deliéuranço
iè recata lis astrado de nòsti fiéu.



Cavado en uno plago que trepejo dins lis uba
clafi de lassige fre,
sa desbrando de bardot,
man jouncho sus la darreiro autoun,
s'arrapo 'mé li lus counsumido d'un regard
que s'amoussou dins lou silènci di coumbo.

Leissas-nous vosto paureta...



5 - Tourna renaisse

La niue de l'ange
escafara li rebat dóu nis de la serp
tóuti li matin poudrien èstre
dis astre de paraulo.
E lou camin tournara mai de t'espera...



Subran en ribo di cresten
dóu patimen de l'amo umano
e di plesi dóu cors di diéu,
uno pensado ternitàri,
arrambo li draiòu.
Uno immensita de deliéuramen
s'encano is ourizount de l'infinita.



Eici, l'alén d'un autre regard
douno i benuranço bretounejado
un tros de ressoun i mesuro dis èstre de-manco:
un vaste mirau d'aubo nouvello
de paciènci e de souveni
escouto e reepio, sènsò relàmbi, la preguiero countemplativo
escricho pèr aquéu santuàri despatria
d'un reiaume di vènt.

Leissas-nous nosto paureta...

6 - Post-fàci

Au fiéu dis escri
sus aquelo pajo de nèu
matado pèr d'annado d'ivèr...

Aquéu Camin, iè disien de toustèm
Camin dóu Bioun !

Elegio foundairis d'un mau
en nòsti car.

La barjo aouroso di toumple
i messorgo de l'antimatèri
noun a esfrucha nòsti pantai.

S'uno lus de vestalo
s'enauro deman coum' un pardoun is aucèu
que seignourejo rèn...
meme pas lou bard à rèire luminous
moute lou pastre expandira la sau
pèr soun avé.

E dóu meme biais
qu'aquéu pastre
amousso lou calèu de mort
au cor d'un sèr secrèt e digne
neda dins la meloudïo
d'un serventès d'estello.

Aquéu camin, ié disien de toustèm
Camin dóu Bioun !

**Edicioun dóu Reviho-pastre
1998**

Tèste integrau

Còpi interdicho

Reserva pèr aquéli qu'an la licènci d'utilisacioun

C.I.E.L. d'Oc

Centre International de l'Écrit en Langue d'Oc

Sèti souciau:

3, plaço Joffre - 13130 Berro.

Tóuti dre reserva - Tous droits réservés - All right reserved.

© **Centre International de l'Écrit en Langue d'Oc - 1998**

© Adoubamen dóu tèste

de la meso en pajo:

e de la maqueto pèr Tricìo Dupuy

en sa qualita de mèmbe dóu Counsèu d'Amenistracioun dóu CIEL d'Oc.